

## XXI. IGANDEA URTEAN ZEHAR (A)

### Otoitza

Jauna, zeure fededunen bihotzak gogo bateko egin dituzu;  
egizu, zeure herriak maita dezala Zuk agindua  
eta itxaron Zuk hitzemanan;  
mundu aldakor honetan dauden bitartean  
gure bihotzek sendo iraun dezaten  
egiazko zoriona dagoen lekuan.  
Zur Seme Jesu Kristo.

I. IRAKURGAIA: Is 22, 19-23

*Hari ipiniko diot lepotik  
Dabiden etxeko giltza.*

Isaias Profetaren liburutik

Honela dio Jaunak Sobnari, errege etxeko buruari:  
«Kendu egingo zaitut zure lekutik  
eta atera zure eginkizunetik.  
Egun hartan nire zerbitzari Eliakini dei egingo diot,  
Alkiasen semeari:  
zure soinekoa eta zure gerrikoa jantziko dizkiot,  
eta zure aginpidea haren eskuetan ipiniko dut;  
eta aita izango da Jerusalem bizi direnentzat  
eta Judako etxekoentzat.  
Hari ipiniko diot lepotik Dabiden etxeko giltza;  
hark irekia, ez du inork itxiko;  
hark itxia, ez du inork irekiko.  
Ziria egur gogorrean bezala sartuko dut,  
bere aitaren etxeari aulki ospetsua emango dio».

ERANTZUN SALMOA: Sal 137, 1-2a. 2bcd-3. 6 eta 8bc

**R/. Betiko dago, Jauna, zure maitasuna,  
ez eskutik utzi zeure eskuz egin duzuna.**

Jauna, bihotz-bihotzez dizkizut eskerrak emango,  
nire hitzak entzun dituzulako.  
Eresi egingo dizut aingeruen aurrean,  
ahozpeztuko naiz zure jauretze santuan. R/.

Eskerrak emango dizkiot zure izenari  
ona eta leiala zarelako,

zure hitzak baitu zure izena egin handiago.  
Hotsegin nizunean, entzun ninduzun,  
eta nire bihotzean kemena indartu duzu. R/.

Benetan garai da Jauna, umilari dio begiratzen,  
harroa, berriz, urrundik du ezagutzen.  
Betiko dago, Jauna, zure maitasuna,  
ez eskutik utzi zeure eskuz egin duzuna. R/.

II. IRAKURGAIA: Erm 11, 33-36

*Harengandik dira gauza guztiak,  
Haren bidez eta Harentzat.*

San Paulo Apostoluak Erromatarrei

Bai handia Jaungoikoaren eskuzabala, jakinduria eta ezaguera! Bai ezin aztertuak Haren erabakiak, eta ezin ezagutuak Haren bideak! Nork ezagutu ditu inoiz Jaunaren asmoak? Nor izan da Haren kontsejatzailerik? Nork eman dio Berari lehendabizi, Berak gero bihurtzekotan? Harengandik dira gauza guztiak, Haren bidez eta Harentzat. Berari aintza gizaldietan. Amen.

EBANJELIOA: Mt 16, 13-20

**Aleluia:** Mt 16, 18

R/. Aleluia.

V/. Zu «Harria» zara;  
harri horren gainean eraikiko dut Nik neure Eliza;  
eta heriotzaren indarrak ez zaizkio nagusituko. R/.

*Zu «Harria» zara; eta zuri emango dizkizut  
zeruetako erreinuaren giltzak.*

Jesu Kristoren Ebanjelioa San Mateoren liburutik

Aldi hartan, Jesusek, Filipoko Zesarea aldera etorri zelarik, honela galdetu zien bere ikasleei:  
«Gizonaren Semea nor dela dio jendeak?»

Eta haiek: «Batzuek, Joan Bataiatzailea dela; beste batzuek, Elias; besteek, Jeremias edota profetaren bat».

Jesusek orduan: «Eta zuek, nor naizela diozue?» Eta Simon Pedrok erantzun zion: «Zu Mesias zara, Jaungoiko biziaren Semea».

Jesusek orduan: «Zorionekoa zu, Simon, Jonasen semea! Ez haragik, ez odolek, ez baitizu adierazi hori zuri, zeruan dagoen nire Aitak baizik. Eta horra Nik esan: zu "Harria" zara; harri horren gainean eraikiko dut Nik neure Eliza; eta heriotzaren indarrak ez zaizkio nagusituko. Zuri emango dizkizut zeruetako erreinuaren giltzak. Eta zuk lurrean lotua, zeruetan ere lotua izango da; eta zuk lurrean askatua, zeruetan ere askatua».

Orduan, Bera Mesias zenik inori ez esateko agindu zien bere ikasleei.

### **Oparigaien gainekoa**

Kristoren opari bakarraren bidez, Jauna,  
zeure seme-alaben herri egin gaituzu;  
emaiozu zeure Elizari batasuna eta bakea.  
Jesu Kristo.

### **Jaunartze ondorengoa**

Eraman ezazu bere betera, Jauna,  
zeure errukizko salbamena;  
eta egizu, Zuk lagundurik,  
gauza guztietan zure gogoko izan gaitzela.  
Jesu Kristo.